

Zeitschrift: Annalas da la Societad Retorumantscha
Herausgeber: Societad Retorumantscha
Band: 78 (1965)

Nachruf: Dr. iur. Erwin Durgiai
Autor: Casaulta, G. G.

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

Dr. iur. Erwin Durgiai

da G. G. Casaulta

Meinsvart stein nus anetgamein avon fatgs zun dolorus, mo nundideivels. In tal ei era stau la mort prematura da nies amitg dr. iur. Erwin Durgiai. Quella tresta nova che ha surpriu nus la damaun dils 20 da mars 1964 ei aunc oz strusch capeivla, pareva gie il preziau defunct da guder ina buna sanadad, schegie ch'el selamentava mintgaton dad in mal che mulestava el beinsavens. Ni el ni ils ses ed aunc bia meins ses amitgs ed enconuschents cartevan denton ch'igl aunghel dalla mort seigi gia en proxima vischinonza. La frestga urdadira digl um all'entschatta dils tschunconta unida cun rara vivacitad steva en memia grond contrast cun certs presentiments d'ina mort anetga ch'el exprimeva mintgaton per ch'ins havess attribuiu a quels seriusa atenziun! Pareta e realitad secuvieran denton beinsavens buca diltut, cunzun prognosas davart il diember da nos dis ed onns cheu sin tiara san esser fetg trompusas. Aschia ei era il fil dalla veta da dr. Erwin Durgiai ruts anetgamein ed ei resta a nus nuot auter che da suttametter al fatg e da seregordar en pietad da sia olma e d'allegar en amicezia zacontas staziuns da sia veta.

Erwin Durgiai ei naschius ils 11 da fevrer 1913 a Trun. Schegie che ses geniturs ein gia setratgs cul buobet da 7 onns ella capitata retica, ha quel manteniu sia veta ora ina admirabla affecziun per sia vischnaunca d'origin e pil tschespet e pievel sursilvan. Suentar la scola primara a Cuera e la matura alla scola cantunala ei il giuven studiosus sedecidius per la giurisprudenza. Allas universitads da Berna, Friburg e Paris ha el acquistau in zun solid fundament per sia clamada. Quella dimora en differentas regiuns d'autra tempra e cultura ha imprimiu ad el il tratg caracteristic ch'ins astga forza resumar cuortamein els plaid: aviarts al mund, mo fideivels ed attaschaus alla patria pli stretga. Ch'ils ligioms cun pievel e tiara da ses babuns ein stai fermes ed intacts tradescha gia il fatg ch'Erwin ha doctorau cun ina zun interessanta dissertaziun davart la lavur cumi-



Dr. Erwin Durgiai

na, ina instituziun che nos antenats tenevan en honur e che manteneva era ad els casa e clavau, rempars e straduns, alps e pastiras.

Turnaus a Cuera absolvescha il neodoctor iuris utriusque sia pratica tier la dertgira cantunala ed arva lu in agen biro d'advocatura ch'ei staus enconuschents lunsch entuorn. Oriunds d'ina famiglia d'aveina commerciala sededichescha el surtut a damondas dil dretg da societads. Buca da smarvegliar, sch'el representa sia veta ora numerusas societads enteifer ed ordeifer la palera da nossa patria. Igl ei denton era buca misteri che biars convischins e surtut era sia vischnaunca nativa han anflau tier el bia gadas agid e cussegl. Era il marcau ed il cumin da Cuera ein seprofitai da ses duns e da sia savida. Aschia ha dr. Erwin Durgiai surviu circa duront in decenni alla publicitad sco commember dalla cummissiun da taglia dil marcau, sco vicepresidente dil cumin da Cuera e suppleant dil Cussegl grond e silsunter sco versau commember dalla cummissiun cantunala da recuors en fatgs da taglia. Sia solida savida ton davart damondas formalas sco en fatgs dil dretg material e concernent problems economics ha dau peisa a ses votums e prestau bia buns survetschs al cuminesser.

Malgrad sias incumbensas politicas e sias biaras fatschentas privatas ei Erwin Durgiai adina staus in premurau e fideivel fegl dalla mumma romontscha. Gia l'eleganza e splendor da siu stil litterar tradevan ina fina cultura. Sco student eis el semess ella retscha dils combattants per l'ierta culturala romontscha ed ei pér cun la mort extraus dad ella. Els onns 1934/36 presidescha il giuven stud. iur. la Romania ed ha gia lu mess sia buna plema el survetsch dalla liunga campagna per la renconuschientscha da nossa viarva sco lungatg naziunal, in fatg ch'ei tscheu e leu vegnius ignoraus e che nus vulein perquei retener en quest liug. Dils 1944 tochen ils 1963, pia quasi dus decennis, ei dr. Erwin Durgiai staus a pér cun dr. h. c. Stefan Loringett al tgamun dalla Ligia Romontscha. En quella qualitat da viceparsura dalla LR ha el prestau cun buns cussegls, fina diplomazia ed intensiva lavur zun prezius survetschs alla Romontschia entira entratga. Igl ei perquei stau nuot auter che dueivel e dretg, da numnar el viceparsura d'honor da quella organisaziun che ha astgau guder aschi ditg ed aschi bein siu fervent sustegn.

Il preziau defunct ha sentiu ils segns dil temps. Perquei eis el gia baul staus pertscharts dalla muntada dil radio per lungatg e cul-

tura romontscha. Il bufatg volum edius ils 1952 sut il tetel «Rätische Erde — Romanisches Erbe» che cumpeglia sias cronicas pil radio dils 1944-1951 demuossa quei gia clar e bein. Mo surtut en sia qualidad sco commember dalla suprastanza dalla Cuminonza Radio Romontsch e delegau el comite central dalla Federaziun svizra da radio eis el sestentaus cun vigur ed energia per francar e meglierar la posiziun dil romontsch tiel radio che porscha gie ina stupenta pusseivladad d'infirmir il contact denter ils Romontschs, mo era denter quels e lur Confederai d'auters lungatgs.

Quella munglusa survesta d'ina veta plein activitad lai perscher che dr. Erwin Durgiai ha fatg bien diever dils stupents duns spirtals ch'il Scaffider aveva regalau ad el. Ella fa era vegnir pertscharts nus dalla largia che sia mort prematura ha caschunau en nossas retschas ch'ei il davos onns insumma vegnidas decimadas da maniera anguschonta. Per ton pli essan nus obligai da semussar engrazieivels viers tals umens cun seregurdar dad els en silenzius mementos, mo era cun tgirar cun quita il beins spirtals ch'els han relaschau a nus per mauns da generaziuns vegnentas. Ti, bien amitg, ruaussa denton en pasch leusi ella tiara benedida ell'umbrija dalla venerabla catedrala!